

Bbaruha gya Paulo Gyakabiri hali Timiteo Kwanjuura

Bbaruha gyakabiri gya Timiteo gya-handiikiirwe Paulo, mukwenda wa Yesu Kurisito. Yaagihandiikiiri Timiteo naali mu biro byamwe bikusembayo nihali hasigeeriyo mwanya gudooli, Neero mukama wa Buruumi aragire Paulo bamwite. Mu bwire buhwo haalingiho kurumbwa kunene hali beikiriza ba mu masaza gensej ga Baruumi. Nahabwakikyo nka kuyaali akoori mu bbaruha gyamwe yakubanza, na mu bbaruha gigi yakabiri, yaalambiri Timiteo ha bigambu bikukwatagana na bwire buzibu bukwiza mu meiso (3:1) na ha beegesa ba bugobya (3:5-9).

Paulo yeekambisiryeye Timiteo kwicala neikiririza mu bukwenda bwa Yesu Kurisito kandi naabutebya atakutiina, kadi mu kurumbwa. Kintu kihandu kya kubanza na kubanza kili nti, bbaruha gigi gyekambisya bantu kugumisirizanga mu hiro bizibu. Bantu bakusemeera kukyega nti, Ruhanga yooyo agira busobozi bwa kuhulukya kigambu kikusembayoona hali muntu; kandi de nti, bahwo bantu beikiririza muli yo, Ruhanga abaha mpeera. Bwomi bwa Paulo huli kyakuwoneraho kirungi ha nsonga gigi.

Bicweka Bihandu bya mu Bbaruha gigi nka Kubihonderegeeni

- (i) Bĩramũkyo na bigambu bya kwekambĩsya Tĩmĩteo 1:1-18
- (ii) Paulo niyeekambĩsya Tĩmĩteo abbe mutatiro 2:1-13
- (iii) Paulo niyeegesya Tĩmĩteo ha bintu bikwahukana 2:14-26
- (iv) Paulo naahabũra Tĩmĩteo ha bintu bikugyenda kubba ho mu bũsumi bwa mu meiso 3:1—4:8
- (v) Bigambu bya Paulo bikusembayo biyaaweereeri Tĩmĩteo 4:9-22

Bĩramũkyo kuruga hali Paulo

¹ Bbaruha gigi girugiri hali gya Paulo, mukwenda wa Yesu, Mutongoole wa Ruhanga kandi wa Ruhanga, munyakutumwa kuweera bantu bigambu bya bwomi biicala mu Yesu, Mutongoole waamwe. ² Ngihandiikiiri we Tĩmĩteo, mwana wa ha mutima gwange. Nĩnkuramũkyo; kandi Ruhanga Bbaa weetũ na Yesu, Mutongoole wa Ruhanga, Mukama weetũ bakugiire mbabazi, bakukwatĩrwe kisa kandi bakuhe bũsinge.

³ Tĩmĩteo, nkusĩima Ruhanga nti, biro byensei, ijolo na mwinsi, ncala nĩnkusabira hali yo. Kandi nkumusĩima habwa kumpa kumũramya, nka bahaaha beetũ kubaaakolengi kadei, nkyegiri nti, mutima gwange guli gũsyanũ. ⁴ Nnzuka mbe bũjune bũnyakukukwata bũtwahũkeenĩ nawe, kandi kyokyo nkwendeerya kĩmweĩ kwĩza kukwo turombe. Habwakubba bũtwakaromba, nkwĩza kwezegwa kurungi hoĩ. ⁵ Na kintu

kindi kinkwizukiraho kyokyo kigambu kya Mukama weetu kiweikiririzemwo na mananu. Nĩnzira de nĩnzizuka nzikiriza gya maawu, Yunisi, na gya zizaawu, Loyisi. Nkyegeeri kimwej nti, nawe kwokwo okukora nka bo kubaakorengi. ⁶ Nahabwakikyo oteebeera kukoresya kisembu kya Ruhanga kiyaakuheeri, budi bunyaakusabijiri nkuteeriho ngalu. ⁷ Habwakubba Ruhanga atuha kwahi mutima gwa butini, beitu atuha mutima gwa kubba ba maani, kwendyangana nka beikiriza, na kwerinda. ⁸ Kale nu hataati, oteezegwa nookuswara kuweera bantu bigambu bya Mukama weetu Yesu Kurisito. Kadi rundi kuswara kubaweera nka kundi munyankomo habwa Mukama weetu Yesu Kurisito. Beitu, weeherayo kimwej nka gya kunyeeheeriyo kutebeerya bantu Makuru Garungi mu kuwonawona nka Ruhanga kwali kusoboresya kukora. ⁹ Habwakubba yooyo mukwendya kwamwe na mu mbabazize, yaacwirimwo kutujuna hali maani ga Sitaani, yaatufoora kubba bantu baamwe, hatali habwa bikorwa byetu, beitu habwa mbabazize. Mbabazi zaamwe zizo, yaazituheeri kuraba mu Yesu, Mutongoole wa Ruhanga mu biro bya kadei, atakahangiri gigi nsi. ¹⁰ Beitu hataati, nka kutwetegeriize atwolokeerye mbabazi kuraba mu kubyalwa kwa mujuni weetu Yesu, Mutongoole wa Ruhanga. Kandi yaamaliraho kimwej maani ga luku, yaakoresya Makuru Garungi, kutumulikira bwomi bwa biro na biro.

¹¹ Yooyo yankomiri kutebeerya bantu

Makuru Garungi, nankoma nka mukwenda waamwe kandi nka mwegesa. ¹² Kikyo kintu, kyokyo kimpeeri kuwonawona yati. Beitu nabwo, mutima gwange guli gutatiro, habwakubba yogwo munyakumpa gugu mulimo, ali mwesigwa. Nkyegiri nti, ali wa maani kandi akwiza kundinda kudoosya ha kiro kya Ruhanga alizikya nsi gigi gyensei. ¹³ Kwatira kimwei na maani bigambu byange bya mananu binyaakwegeseerye, otheo mutima kubihondera. Kandi okwatire kimwei bibyo bigambu biweikiririzemwo, otheo maani ha kintu kya kwendyangana kutwendyagana nka beikiriza mu yogwo Yesu, Mutongoole wa Ruhanga. ¹⁴ Mwozo wa Ruhanga yogwo eicala muli twe, akuhe kulinda bintu byensei birungi bya Mukama weetu biyaakukwatiirye.

¹⁵ Nka kuweegiri mumu mwisaza ly'Asiya, huli muntu anyeehoogiri, mu bantu banyehoogiri, hoo ho hali Fijelo na Heremojene. ¹⁶⁻¹⁷ Beitu kandi, Onesifooro buyaali naacakadwa budwe mu rubuga lwa Rooma, yaatandikiirihokuntolereerya kudoosya buyanzagiirye. Nkusaba Mukama weetu agiire mbabazi bantu ba mu maka gaamwe. Kubba bibyo biro byensei, yooyo eicala nampumuulya mumu mu nkomo, atakwegwa kuswara. ¹⁸ Nkusaba Mukama weetu, amujune mu mbabazi zaamwe ha kiro kikyo kya Ruhanga alisalira bantu bensei musangu. Kubba bintu byensei biyankoleeri mw'Efeeso okubyega kurungi.

2

Mũlwani Murungi wa Yesu Kurisito

¹ Hatĩ we mũtabani, tatiira mu mbabazi za Ruhanga weetu zituteeraniza hamweĩ mu Yesu, Mutongoole wa Ruhanga. ² Kandi, bigambu bimbanga nimbaza hasyanũ mu bantu banene, nkukusaba obitwale, obyegesye bantu beesigwa. Nabo de kwokwo balikora yatyo, bakwiza kubba nibakusobora kwegesya bantu bandi.

³ Beitu nka mũlwani wa Yesu, Mutongoole wa Ruhanga, akuhondera biragiyo bya mukama waamwe, ikiriza kuwonawona. ⁴ Mũlwani yensei hwabba ha mulimo, akora bya mũhandũ waamwe akwendya, kyokyo yeezagya atakusobora kukora bintu bikwisana na bya bantu bensei. ⁵ Kindi, mwirũki yensei wa mbiro za mpaka tasobora kusinga mbiro, akatunga kisembu kutoolaho eikiriize kuhondera biragiyo bya zizo mbiro. ⁶ Kyokyo kimweĩ na mũlimi yeekamba kukora na maani. Bintu biyaalimiri hubibba byeriri, yooyo akusemeera kubba wa kubanza na kubanza kubidyaho muntu wondi yensei atakabidiriho. ⁷ Biyo bintu bindimukukuweera okusemeera kubitekerezangaho, hawakubba Mukama weetu akwiza kukuha kubyetegereza. ⁸ Bigambu bya Yesu Kurisito, Ruhanga giyaahimboori kuruga mu bakũũ, kandi munyakubyalwa mu kika kya Daudi mukama w'Isaleeri, googo Makuru Garungi gantebya. Biyo bigambu, otalibyebeera. ⁹ Hawa gagwo Makuru Garungi gantebya, kyokyo ncala nimbonawona, kandi

kyokyo ndi mu nkomo, nka rundisi nyagumĩrĩ musangu gukooto hoj. Kandi gya, nabunyakabba nindi mu nkomo, kigambu kya Ruhanga tikisobora kulemwa kusaasaana. ¹⁰ Beĩtũ, haɓwakubba Ruhanga ali na bantu baamwe baasoorimwo, kandi akwendya beeziremwo bibiibi byaɓu, kyokyo nanya nyeehereeriyo kimweĩ kuwonawona. Kubba mu kuwonawona kwange, Yesu, Mutongoole wa Ruhanga, akwiza kubajuna hali maani ga bibiibi byaɓu, naabaha kitĩĩnĩsa kya biro na biro.

¹¹ Kubba bigambu bya Ruhanga bikoba yati, Twakabba nituli baakukwa nayo, kwokwo de tulihimbooka nayo

¹² Twakagumisiriza bizibũ nayo, kwokwo de tulilema hamweĩ nayo Twakamusuula nitukakoba, tĩtũmwegiri, kwokwo nayo alitusuula naakoba, tatwegiri

¹³ Twabba nitukukoba tuli kwahi beikiriza baamwe, beĩtũ yo, akwiza kwicala naali mwesigwa hali twe, Kubba yo, eicala wa mananu biro byenseĩ.

Ruhanga Yendya Mukorĩ Akukora Birungi

¹⁴ Nahabwakĩkyo, oli nakwicala noopom-pogeerya kandi niweegesya bantu ba Ruhanga hasyanũ mu meiso gaamwe, beehale kukuuta mpaka za bigambu bya Ruhanga zitali na mutwe na magulu. Mpaka zikwisana yatyo tizigasira bantu bakũzeegwa. ¹⁵ Kindi, weekamba kwicala nooli mũsyanyũ mutima mu meiso ga Ruhanga, nka muheereza wa Ruhanga atali na kintu

kyensej kikumwiririya inyuma, kandi kikusobora kumuha kuswaraswara kwegesya kigambu kya Ruhanga kurungi. ¹⁶ Kandi, weehale kukuuta mpaka zitali na mutwe na magulu. Habwakubba bantu beicala mu bintu bikwisana yatyo, badahira-budahiri hali Ruhanga. ¹⁷ Mpaka za yatyo ziicala zibiibi zisana nka kihote kinyamapu nka kukidya mubiri gwa muntu. Haloho bantu babiri beeheeri mulimo gwa kwegesya bigambu bikwisana yatyo, boobo baba: Himentaayo na Filute. ¹⁸ Barugiri ha mananu ga bigambu bya Ruhanga, baakutebeeryanga bantu nibakoba nti, Ruhanga yamaari kadei kuhimboola bantu baamwe kuruga mu kukwa, kandi nti, kuhimbooka kundi kukwiza kubbayoona mu biro bya meiso, kuli kwahi. Kale nu, mu mulingo gugwo bahabiirye beikiriza bandi. ¹⁹ Beitu go mananu ga Ruhanga, biro byensej geicalaho nka Binyakuhandiikwa kubikoba nti, “Yo Ruhanga bantu baamwe eicala abeegiri biro byensej, tihaloho gyateegiri,” na kindi “Yogwo yensej akwezeta wa Ruhanga, yeehale kukora bintu bibiibi.”

²⁰ Mu nnyumba gyensej gya kitinisa, habbamwo bikwatu bya mugasu hoj, binyakukorwa mu feeza na zaabbu, na bindi bitali bya mugasu hoj, biheese na byeibumba. ²¹ Nahabwakikyo, muntu yensej akwiza kwefaho akesyana mutima gwamwe hatali kwicala nka bantu batakufaaho bigambu bya Ruhanga, akwiza kubba nka bikwatu bibyo bya mugasu hoj mu kukora milimo mya Ruhanga. Habwakubba bibyo bikwatu

bilisoroorwamwo, aleke Mukama weetu abikoresye mulimo gwensej gurungi guli gwa kitijisa. ²² Nahabwakikyo, weehala ngesu zensej za kwegomba kubiibi za busigazi, weekambe kubba musyanu mu meiso ga Ruhanga, oikirizenge mu bigambu byamwe, oicalenge niwendya beira baamu nka beikiriza, kandi oicalenge na businge mu mutima gwamu. ²³ Na kindi, bintu byensej bikukwatagana na mpaka za budomadoma zitali na mutwe na magulu, otazihondera, habwakubba, nka kuweegiri, mpaka za yatyo zileeta izongobo. ²⁴ Kandi tikisemereeri muheereza wa Ruhanga kuzongazongoba, beitu kyakusemeera kukora kyokyo kubba wa mbabazi hali bantu bensej, na kwegesya bantu kigambu kya Ruhanga. Takusemeera kubba na nnobi mu mutima gwamwe; ²⁵ beitu, muhabura bantu bensej batakwikiriza mananu ga Ruhanga; alina kuwona akwetu bantu mpula mpula. Habwakubba mu mulingo gugwo, Ruhanga akusobora kubajuna nibeeziramwo bibiibi byabu, kandi nikibarugiiramwo kwegu mananu ga bigambu bya Ruhanga. ²⁶ Heinyuma gya kwegu mananu, bakwiza kwetegereza nka kubahoniri bugobya hwa Sitaani. Habwakubba yo Sitaani kigyendeerwa kyamwe kyali kya kubeicalya banyankomo ba bikorwa byamwe.

3

Bujune Bulibbaho mu Biro bya Kumaliira

¹ Kandi we, Tjĩiteo, osemereeri okyege nti, mu biro bya kumaliira, Mukama weetu Yesu Kurisito naali heehi kwira kusalira bantu musangu, halibbaho bujune bunene hoj. ² Habwakubba mu biro biyo bantu balibba bantu bakwendya bya mitima myabu misijimiri, batakufaaho bandi nka kubali; balibba na mururu gwa sente zinene. Bantu balibba na myehembo kandi bagayi. Balibba bajoogi kandi bantu batakutamwo kitinisa babyeru baabu; balibba bahoonyola minwa kandi babiibi mu mitima myabu. ³ Balibba bantu bakuu mitima, batali na kuganyira mu mitima myabu, na magezi ga kwerinda, batakweferaha bwomi bwa bantu bandi; balibba bandaarya makuru haha na hadi, batabuku mitima kandi batakwendya kuwonaho kintu kyensei kirungi. ⁴ Balibba bagobya, ntabiganye, kandi bakwetembya kubba bantu ba hakyendi hoj; balibba bantu bendya kwicala mu kusemererwa saaha zensei, kukira kwendya bigambu bya Ruhanga. ⁵ Balibba bantu bakwefoora kubba bantu ba Ruhanga, beitu kandi batakwikiririza mu bigambu na maani ga Ruhanga. Nahabwakiyo, weehala bantu bakwisana yatyo.

⁶ Babwo badulu boobo bagyenda mu maka ga bakali badomadoma mu nsita niboohya babwo bakali, habwakubba bo bakali nabo bankei, bakubbanga nibakwendeerya kimwei kukora bintu bibiibi, kandi batakusobora wehala kubikora. ⁷ Beitu bakali nka babwo tibalidwa hakwetegereza mananu ga Ruhanga, kubba na bintu bihyaka bibabegeesya huli

kiro, tibabikwata. ⁸ Nka Yaane na Yambere* kũbaaswĩrĩ kukwata bigambu bya Mũsa mu biro bya kadei, kwokwo de na baḥwo bantu baswĩrĩ mananu ga bigambu bya Ruhanga. Bagwagĩrĩ kimweĩ, na Ruhanga yaabanuga haḥwa bintu bibakuhondera. ⁹ Naḥubaabba nibakwekora biḥyo bintu, tibakusobora kubikora kumala kasũmĩ kalei, haḥwakubba bantu benseĩ bakwĩza kudwa hakubeetegeriza nka kubali bacoome; nka kubeeeteriize Yaane na Yambere kubba nibali bantu bacoome.

Paũlo Naalamba Tĩmĩteo

¹⁰ Beĩtu we, Tĩmĩteo, bigambu byange biḥyeegesya bantu, na ngesu zange, na bigyendeerwa byange nka muntu, obyeḡĩrĩ. Bigambu bya Ruhanga binzikiririzamwo, kuteekana kũteekeenĩ mu mutima gwange, ngonzi zĩnyoolokeerye beikiriza ba Yesũ benseĩ nka bantu ba luganda lumweĩ, kuwonawona kumbwenaweenĩ, biḥyo byenseĩ de, obyeḡĩrĩ. ¹¹ Bantu bandũmĩrĩ, na bandi bankũũtĩrĩ na kunkuuta kusĩḡĩkĩra ku bintu binyakubbaho mu mbuga za Antyokiya, Ikonjo na Lisituura; biḥyo bintu byenseĩ nyaabĩḡũmĩrĩ. Beĩtu Mukama weetu biḥyo bintu byenseĩ yaabĩmponeerye. ¹² Go mananu gali nti, bantu benseĩ bakwendya kuhondera bya Ruhanga biyaaragĩrĩ Yesũ, Mutongoole wa Ruhanga, balina kweteekanize, haḥwakubba banyanzĩgwa ba kigambu kya Ruhanga bakwĩza

* **3:8** 3:8 Yaane na Yambere baali bafũmũ banyakwesanasana, baakora byamahanu mu meiso ga Mũsa na Faraaho, mukama wa Mĩsĩrĩ.

kubalwanisya. ¹³ Kasi kandi bahwo nkorj za bibiibi na bahwo bagobya bakwiza kubba babiibi hoj mu hugobya hwabu. Balihabya bantu, kasi kandi nabo bankei bantu bandi beire babagobye. ¹⁴ Beitu kandi we, kwatira kimwei na maani biyo bigambu biweikiririzemwo na bigambu bibakwegeseerye. Habwakubba bahwo bantu banyakubikwegesya obeegiri. ¹⁵ Kandi, nka kuweegiri nti, waatandikiri kwegu Binyakuhandiikwa bya Ruhanga noocaali muto, biyo bigambu byo byo bikuheeri magezi ga kwikiririza mu Yesu, Mutongoole wa Ruhanga, yaakujuna kifubiro kya Ruhanga aliha bantu bensei babiibi baswiri kumwikiririzamwo. ¹⁶ Bigambu bya Ruhanga byensei Binyakuhandiikwa, Ruhanga yooyo yaabiheeri maani gakubifooru bya mugasu mu mitima mya bantu baamwe. Yaabihaheeri bibahe kwegesya bantu, kuwona nsobi zili mu bantu, kubahabura na kugegesya nka kubakusemeera kwicala. ¹⁷ Mu mulingo gugwo, Ruhanga abba na kuha bantu baamwe magezi ga kukora mulimo gwensei gurungi.

4

¹ Yesu, Mutongoole wa Ruhanga, hwalijira kulema hukama hwamwe, alisalira bantu bensei musangu, bakuu na boomi. Nahabwakikyo, Ruhanga hamwenya na Yesu, Mutongoole waamwe, nibali bakeiso bange, nkukulamba: ² Icalanga weteekanize kutebeerya bantu, bigambu bya Ruhanga. Nabubwabbanga hwire hwa bantu hubakwendeeryamwo kwetegeerya,

rundi habatakwendeerya kwetegeerya, otebyenge bigambu bya Ruhanga. Okuteekwa kwolokyanga bantu, bintu bibiibi bibakoori, noobaweera baleke kubikora. Beitu kandi de, okuteekwa kubeiryangamwo maani; bubuwo nu, nookubeegesya na kugumisiriza kunene hoj. ³ Nkulambiri okore biyo, habwakubba kasumi kakugyenda kudwa, ka bantu bakwiza kubba batakwendya kwetegeerya nzegesya gya mananu gya Ruhanga. Mu kiikaru kya nzegesya gya mananu, bakwiza kwendyanga kuhondera bintu byabu bo bibakwendya, nibeetooleerya begesa baabu banene, beize babaweere bigambu, bo bibakwendya hoj kwegwa. ⁴ Bantu, bakwiza kuruga ha kuhondera mananu, nibata mitima myabu ha bihanuuro hitali na mugasu. ⁵ Beitu we, mu mulingo gwensej guwaakabbangamwo, okusemeera kwicalanga oteekeeni niweegyendereza, kandi de, weeheeriyo kuwonawona. Bantu, baweerenge Makuru Garungi gakukwatagana na Yesu Kurisito, kandi, okorenge huli kintu kyenseenya, kyokusemeera kukora nka muheereza wa Ruhanga.

⁶ Okuteekwa kuhondera biyo bintu binkuweereeri, habwakubba gya nabundoho, nsigaliirye kasumi kadooli hoj, Ruhanga antoole mu nsi. ⁷ Gya nabunyakabba nceeri nindombya bizibu binene mu kukoora Ruhanga, nyeekambiri kimwej kumukoora, nka mwiruki kuyeekamba kuwona asingiri mbiro. Ndoori ha kumaliriza mulimo gwa Ruhanga guyampeeri kumukoora, nka mwiruki kwadwa

ha mbiro zikumalikira. Kandi de, ntebeerye bigambu bya Ruhanga, nindi mwesigwa.*
 8 Nahabwakikyo, nkugyenda kutunga kisembu, habwa kudoosereerya kurungi biragiyo bya Ruhanga. Yogwo Mukama, asala misangu mu bwijanjanu, yooyo ha kiro kya kumaliira, akwiza kumpa kikyo kisembu. Kikyo kisembu, alikiha kwahi gya muntu omweji; alikiha na beira bange benseenya, babwo bataaha bamulindiriri eire.

Paulo Niyeta Tĩmĩteo Eize Bwangu hali Yo

9 Weekamba hoji, kuwona nti ojiziri wangu, hali gya; 10 habwakubba, Deema yendeerye hoji bintu bya nsi, byamuleetereerya kundugaho, yaagyenda mu rubuga lwetwa Sosolonika. Kereseke, yo yaagyendiri mu nsi gyetwa Galatiya, kandi Tito, yo yaagyenda mu kicweka kyetwa Dalamatiya. 11 Hataati, mu babwo bantu banyalingi nabo, Luuka yooyo musa, ginsigaliirye. Bwolibba nookwiza, owone Mariko mwize nayo, habwakubba akwiza kunjuna mu mulimo gunkukora. 12 Tikiko yoodede, nyaamutumiri agyende mu rubuga lw'Efeeso. 13 Bwolibba nookwiza, ondeeteregene kyakulwala kyange kya hakyendi kya mu bwire bwinyamu, kinyaatigiri mukori mwira wange Karipo, wa mu rubuga lwa Turoowa. Kandi de, ondeeteregene bitabbu, na kukira maani, binyo bya mugasu hoji, binyakukorwa mu bikuta.

* 4:7 4:7 Bbajbbuli zindi zikoresya Nyalweni kulwana kurungi, nyadoosereerya luyendu lwange, ndindiriri kwikiriza.

14 Alekizanda, mwokya byoma, yankoori kubiibi hoj; Mukama alimusasula habwa biyo biyaakoori. 15 Naweede, osemereri omwerinde atakukola kubiibi, habwakubba bukwenḁa hwetu, twe nawe hututebya, yaahunobeeri kimwej.

16 Murundi gwange gwa kubanza gũnyemereeri mu meiso ga musali wa misangu kwetonganaho, hatakabbeho kadi muntu omwej, munyakuntonganiira; bantu bensej, banzirukiri. Nkusaba Ruhanga atalibafubira, habwa hutasagika. 17 Beitu kandi, Mukama yaali nanya; yampa maani, nyaasobora kutebya bukwenḁa hwenseenya hwa Ruhanga buyampeeri ntebeerye Banyamahanga bensej, babwegwe. Kandi de, Mukama yanjuniri, baahula kunsalira, musangu gwa kukwa. 18 Kandi de, Mukama akwiza kunjuna hali bintu bibiibi byenseenya, antwale dwe, mu bukama hwamwe hwa mwiguru. Kitijisa kibbe hali Mukama biro na biro! Amiina.

Paũlo Naaraga

19 Ondamukiirye Akwila, na mukali waamwe Purisila. Kandi de, ondamukiirye na bantu ba mugĩ gw'Onesiifoo. 20 Erasito yaasigeeri mu ruhuga lukooto lwa Kolinsu; Turofimo yo nyaamutiga mu ruhuga lwa Mileeto, ahimbiri. 21 Olwanisye hoj nka kwokusobora, kuwona nti oiziri, busumi hwinyamũ hutakabbeerĩ kudwa.

Yubbulo, Pudensj, Liino, Kilawudiya, hamwej na beira beetũ bandi benseenya, beikiririza mu Yesu Kurisito, bakuramukiirye.

²² Mukama eicale na Mwozo gwamu; kandi, na mbabazi za Ruhanga, ziicale hamweji nanywe nywenseenya.

Ndagaanu Gihyaka
Gungu: Ndagaanu Gihyaka New Testament

copyright © 2017 Wycliffe Bible Translators, Inc.

Language: Gungu

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 22 Feb 2024 from source
files dated 29 Jan 2022

b2d1b010-ce36-53f8-94bb-ea31f34239cc